

□**कहाणी** **बंटवारै**

हनुमान दीक्षित

कहाणीकार परिचै

कहाणीकार हनुमान दीक्षित रौ जलम 4 मई, 1943 में होयौ। अमे.ओ., बी.ओड. तांई भण्योडा श्री दीक्षित अध्यापन-सेवा करता थकां प्रधानाध्यापक रै पद सूं सेवानिवृत्त होया। आप हिंदी अर राजस्थानी दोनूं में लगोलग सिरजण करौ। राजस्थानी में वांग 'गांव-गळी री कहाणियां' अर 'माटी रौ मकान' कहाणी-संग्रे छप्योडा। 'डाकी दायजौ' नांव सूं आकासवाणी सारू रेडियो-रूपक ई लिख्यौ। आपरी कहाणियां जमीन सूं जुड़योड़ी ग्राम्य परिवेस री रंगत लियोडी है, जिणमें राजस्थानी री माटी री मधरी-मधरी महक आवै। वै केई साहित्यिक संस्थावां सूं जुड़योहा हा। राजस्थानी री सेवा सारू वांरै काम सरावण जोग रैयौ। वै राजस्थानी भाषा, साहित्य एवं संस्कृति अकादमी रा उपाध्यक्ष रैया। इणरै अलावा वै राजस्थान साहित्य अकादमी, उदयपुर रा ई सदस्य रैया। कहाणियां रै अलावा वां राजस्थानी में कवितावां, व्यंग्य, बाल-साहित्य अर निबंध ई लिख्या। आपरै सुरगवास 17 दिसंबर, 2015 नै होयौ।

पाठ परिचै

बडेरां री भेल्प अर साझा रीत नैं दरकिनार करती आज री पीढी री मनोदसा अर फंटवाडै नैं चौड़ै करती सास्वत कहाणी 'बंटवारै' आम आदमी रै जीवण री कहाणी है। आज भेल्प अर भाईचारै मिटता जाय रैया है। परिवार री संपत संपति रै चक्कर में चकरीज री है। गांव री आतमा में जकौ परमातमा रौ वासौ हौ, बठै बगत रै बदलाव री चौसर सगळौ सत्यानास कर न्हाख्यौ। लोगां री जमीन अर मन दोनूं बंट रैया है। जमीन रै बंटण सूं घरां री दरारां आंगणै सूं लेयनै मिनख रै मन-मगज तांई बधगी है। साझा खेती आरथिक, सामाजिक अर वैग्यानिक आद सगळी दीठ सूं महताऊ है, पण आप-आपरा स्वारथ मांयलै धीरज नैं कपूर बणाय दियौ। सगळी भेल्प, भाईचारै, रिस्ता री मीठास, मिनखाचारौ सगळौ कीं होळै-होळै मिनख सूं अळगौ होवै है। इण सारू चेतणौ जरूरी है। दीक्षित जी आपरी इण कहाणी मांय बंटवारै री पीडै नैं सांगोपांग ढंग सूं उकेरी है अर आखर कहाणी रै अंत में भेल्प री हूंस अर आस सागै कथानक सिमटै। कहाणी में बगत सागै मिनख अर गांव दोनूं में बदलाव नैं बतायौ है। कुल मिलायनै बंटवारै कहाणी सामाजिक समस्या प्रधान ग्रामीण परिवेस री प्रासंगिक अर युगीन कहाणी री पांत में सिरै आवै।

बंटवारै

रामसरौ मोटौ गांव। चौधरी रतनाराम इलाकै रौ मोटौ मिनख। मोटी गुवाड़ी रौ धणी। रियासत रै बगत सूं मिल्योड़ी लंबरदारी। आजादी आयी। लंबरदारी गई परी, पण लोग अर सरकारी कारूंदा वाँनै लंबरदार सा 'ब कैवै। चौधरी कनै मोकळी जमीन। औ ई कोई तीन सौ बीघा अर तीन भाई। बिचलै रौ नांव हेतराम जकौ खेती-पाती री देखभाल करै। छोटै भाई रौ नांव साहबराम, जकौ दसवीं जमात तांई पढ्योड़ै। राजनीति भी करै, सागै ई मंडी जायनै खेती री निपज बेचणी अर बठै सूं घर री जरूरत मुजब चीज-बस्त खरीदनै ल्यावण रौ काम ई करै।

खेती रौ घणकरौ काम-पाड़, पाती, बीजणौ, अनाज काढणौ आद ट्रैक्टर सूं करै। पण चौधरी नैं पुराणी रीत सारू मदुवौ ऊंठ राखण रौ घणौ कोड। सरदी रै टैम मांय बाखळ में खड़गौ ऊंठ बलबलावै अर माकड़ी पीटै जद देखनै चौधरी रौ जी-सोरै होय जावै। चौधरी सवारी करण खातर घोड़ी ई राखै। गांव-गांवतरौ करनै वौ अपूर्तौ आवतौ तद भीमलै रै ताल में पड़ती घोड़ी री टापां सूं ठा पड़ जावतौ कै चौधरी आवै है। वौ कारू-कारिंदा रै भरोसै ऊंठ-घोड़ी नौं छोडतौ। खुद नीरतौ अर आथण पौर रौ पाणी पावण सारू जोहड़े ले जावतौ। गांव री बहू-बेटियां चौधरी रौ घणौ काण-कायदौ राखती। जद पाणी लावती बीनणियां साम्हीं मिळ जावती तौ वै आदर देवण खातर पीठ मोड़नै ऊभी ढब जावती।

चौधरी रै घरै दूध-छाछ री कमी नौं ही। तीन भैंस अर पांच-छह गायां नोहरै में हरदम बंधी रैवती। दिन ऊगणै सूं पैली ई बिलोवणै री आवाज उगाड़ में दूर-दूर ताँई सुणीजती। भाख फाटतां रै सागै गांव री लुगायां अर टाबर लोटा, हांडी अर जग लेयनै छाछ खातर चौधरी री ड्योढ़ी माथै ऊभा होय जावता।

आथण पौर चौधरी री चूंतरी माथै गांव री चौपाल जुड़या करती। चौधरी होकौ भरनै मुड़ै माथै बैठ जावतौ। सै भांत रा लोग आ बैठता। होकै री कुरड़-कुरड़ रै सागै गांव-देस री, सुख-दुख री बातां होया करती। चौधरी गांव रा गरीब-गुरबां रौ घणौ खयाल राख्या करतौ। जद कदै इलाकौ अकाळ री चपेट में आ जावतौ तद आपरी बखारी अर चारै-तूड़ी रै कुपां रौ मूँडौ खोल देवतौ। सगळ्यां रै सुख-दुख रौ सीरी हौ। जरूरतमंद मिनख उम्मीद लेयनै आवतौ अर मूँडै पर हांसी लियां पाछौ जावतौ। लोग चौधरी रै भरोसै आपरी बेटी री व्यांव मांड देता। बण जींवतै-जी ना-नुकर नौं करी। आधी रात पछै ताँई चौपाल लागी रैवती। जद होकौ ठंडौ पड़ जावतौ तद कारू-कारिंदा खीरा अर तंबाकू ओज्जूं टेक लावता। गरमी री टैम मांय धूणी कोनी धुकती, पण सरदी में सगळ्यां बिचालै धूणी धुक्या करती।

गांव में काम सारू सरकारी हाकम, पटवारी, सिपाही आद आवता तद लंबरदार री बैठक में रुकता। जाण-पिछाण वाला ई नौं, राह-बगता बटाऊ भी रातवासौ लेवता। सेंग जणा नैं डोळ-माजणै सारू आवभगत अर रोटी-खाट मिळती।

सूरज भगवान रौ रथ जियां धूमै बियां टैम रौ पहियौ भी सरकतौ रैयौ। लंबरदार आपरी उमर रा अस्सी फागण देख लिया। आंख्यां अर गोडा जबाब देयग्या। अब घर में अर बारै साहबराम री चालण लागगी। बीं रौ राजनीति करण रौ चस्कौ बधतौ गयौ। पंचायत रा चुणाव आयग्या। चौधरी रै बरजतां-बरजतां वौ सरपंच रै चुणाव में खड़गौ होयग्यौ। उणैर साम्हीं ठाकर जसवंत सिंह खड़गौ हौ। ई सूं पैली गांव री पंचायत रौ चुणाव सदीव निर्विरोध होया करतौ। सेंग जणा भेला होयनै पंच-सरपंच चुण लेवता। सरकार कानी सूं पुरस्कार में मोटी रकम लेयनै गांव रै विकास में लगा देवता।

जकी चूंतरी माथै आखै गांव री चौपाल जुड़या करती, गांव रै विकास री बातां होया करती, अबै बैठै पटका-पछाड़ी री योजना बणण लागगी। चौधरी रै प्रभाव सूं आधै सूं बत्तौ गांव साहबराम कानी हौ। पण गांव तौ बंटग्यौ ई। चौधरी कनै सगळी बातां पूगती जद सेंग जणां नैं आ इज समझावतौ कै मन माठौ ना करै। अेक-दूसरै री बुराई ना काढौ। जिकै नैं जनता चावैला वौ इज सरपंच बणसी। पण सुणै कुण ? सगळा आपचायी करै। जियां-जियां चुणाव री तारीख नेडै आवती गई बियां-बियां खरचै रा खाल बिगड़ण लागग्या। रिपियां रा पनाला बैयग्या। छेवट जीत साहबराम री होयी।

चुणाव रै सालेक पछै चौधरी बीमार पड़ग्यौ। घणी दवा-दारू करीजी, पण स्हारौ नौं आयौ। अेक दिन वौ सगळा जणा नैं भेला करनै बोल्यौ, “इण दुनियां में कोई कोनी रैयौ। राम-रावण सरीखा नौं रैया। सबनैं अेक न अेक दिन जावणौ ई पड़ै। म्हैं तौ सोरौ-सुखी जाऊलौ। म्हरै जी में अेक बात अटकी पड़ी है जकी थानै कैयनै जाऊं। बीं पर चालस्यौ तौ सुख पावोला। खानदान रौ नांव ऊंचौ रैसी। धरती किसान री मां होवै। मां कदैई कोनी बंट सकै। वा

सगळा बेटां री मां होवै। जमीन नीं होवण सूं भूमिहीण बण जावै। म्हारौ औ कैवणौ है कै जमीन मत बांटज्यौ। समै सारू भेळा नीं रैय सकौ कोई बात कोनी, पण खेती मिळ्नै करूया। फसल भलाईं बाट लीजौ। जमीन बांटण री बेमारी चाल रैयी है। घणै टैम पैली म्हरै कनै खेती-बाडी अधिकारी आयै। आ बात म्हनै समझायी कै छोटा-छोटा जमीन रा टुकडा आरथिक दीठ सूं लाभप्रद नीं होवै। आज आपणै कनै तीन सौ बीघा जमीन है जद मोटी गुवाडी बाजै। आ इज जमीन म्हे भाई बांटल्यां तौ सौ-सौ बीघा पांती आवै। फेरूं आपणै टाबरां में बंटती जावै तौ छेवट दो-दो बीघा पांती आसी। किसान सूं आपणी औलाद मजूर बण जासी। आपां नैं टाबरां नैं पढावणा चाईजै, जकै सूं वै दूजा धंधा कर सकै। आपणा बडेरा कैया करता हा कै 'घण जाप्या ऊत जा कै घण बरस्या', साहबराम नैं खास तौर सूं ताकाद करूं हूं कै थूं सरपंच है, सगळे गांव रौ खयाल राखी। आपणै कनै आवणियै री डोळ-माजनै सारू मदद करजै। सगळां रौ भलौ करजै। बुरा कदैई मत बिचारजै।"

कई दिनां पछै चौधरी बिंयासी बरस री उमर लेय देवलोक होयग्यौ। सगळै गांव दुख मनायौ कै म्हारै रुखाळै चल्यौ गयौ।

चौधरी री सीमख घणा दिनां ताईं कोनी मानीजी। गढ जैडौ मकान तीन हिस्सा में बंटग्यौ। बाखळ में दो भींतां खींचनै तीन हिस्सा कर दिया। खेत ई बंटग्या। जमीन बंटी जद घणी ले-दे, चख-चख होयी। रिस्तेदार भेळा होया। आपस में खींचाताण होयी। जकौ घर सगळै इलाकै री पंचायती करूया करतौ, अबै दूजा लोग उण घर री पंचायती करण लागग्या। छेवट चौधरी रतनाराम रौ बेटौ दुनीराम ई आपरी मांरै कैवण सूं कम उपजाऊ अर टीबै वाळी जमीन लेवण सारू राजी होयग्या। जमीन काईं बंटी, मन भी बंटग्या। जकी चूंतरी माथै आखौ गांव भेळा होया करतौ, बठै अब घरवाळा ई भेळा नीं होवै। अबै वा सूनी पड़ी रैवै या उण माथै झाबरियो गंडक पड़्याँ रैवै।

कई सालां पछै दुनीराम री छोरी चंदा रौ व्यांव मंडग्यौ। दिनुगै-आथण गीत गाईजै। घर रा नीं आवै। आडोसी-पाडोसी जरूर आवै। इण मौकै परिवाररौ बामण तेजाराम आयौ। तेजाराम चौधरी रै देवलोक री बगत आयौ हौ। बाखळ में भींतां खींची देखनै उदास होयग्यौ। नीं बठै घोड़ी हिणहिणावै ही अर नीं मदुवौ बलबलावै हौ। भींत रै खूणै में बंधी डाग जरूर अरड़ावै ही। पंडतजी सगळा भाइयां रै घरां गयौ। सैंग जणा सूं रामा-स्यामा करी। हालात रै जायजौ लियौ।

आथण पौर में रोटी जीमनै बैठक में जा बैठ्यौ। केई ताळ ताईं अेकलौ ई बीड़ी फूंकतौ रैयौ। फेर मांची पर आडौ होयग्यौ। सांमली भींत माथै महात्मा गांधी री तस्वीर टंग रैयी ही। बीं तस्वीर रै तळै रतनाराम चौधरी री। तेजाराम सोच में पड़ग्यौ कै इण बापू गांधी देस नैं बांटण वाळी बात रै घणै विरोध करूयौ। लोगां नैं, नेतावां नैं कितरा समझाया। भारत म्हारी मां है। आपणी सगळा री मां है। भेळा रैवै, पण जिन्ना सरीखा धरमांध माणस हित री बात नीं सुणी। देस बंटग्यौ—तीन हिस्सां में। लाखू माणस तबाह होयग्या। हजारूं सुहाग उजङ्ग्या। घणी उथळ-पाथळ माची। देस नैं बाट काईं सुखी होया। चौधरी भी घणा समझाया। जमीन मत बांटज्यौ। बीं रै जावतां ई जमीन बंटगी। घर बंटग्या अर सागै मन ई बंटग्या।

थोड़ी ताळ पछै तेजाराम कनै दुनीराम चिलम भरनै बैठग्यौ। केई ताळ ताईं घरबार, गांव-गुवाड़ री बातां होयी। दुनीराम सगळी कहाणी बंटवारै री सुणाय दी। सुणनै तेजाराम बोल्यौ, "चौधरी री बात पर थे सगळा जणा कोनी चाल्या। घर-जमीन बंटग्या। संपत कोनी रैयी। आ बात सैं सूं माड़ी होयी। ईट जुङ्यां भींत खड़ी होवै। भींत पड़ी अर डगळिया खिंड्या। म्हैं थांनैं कैवूं कै ओज्यूं भी भेळा होय सकौ हौ।"

"म्हे फंट्योडा कीकर भेळा हो सकां हां पंडतजी? म्हांरा तौ मुसाण ई कोनी मिळै।" दुनीराम बोल्यौ।

तेजाराम पडूतर देवतौ थकौ बोल्यौ, "थांरा सगळां रा ओळ-नाळा जद अेक जग्यां गङ्गा है तौ मुसाण ई अेक जग्यां रैसी। थूं बडै मिनख चौधरी रतनाराम रौ बेटौ कुहावै। दूटी जेवडी नैं फेरूं जोड़। बिना गांठ लगायां बट लगायनै पाढी जोड़। चंदा रै व्यांव है। परिवार बिना व्यांव फूठरौ नीं लागै। चंदा, रतनाराम री पोती नीं है, हेतराम

अर साहबराम री ई पोती है। थूं म्हरै सागै चाल, म्हैं सारी बात कर लेस्यूं। व्यांव पर भेळा करणा म्हरै जिम्मै। म्हैं तौ सगळ्या रै ई साझौ बामण हूं।'

केई ताळ ताईं दोनूं जणा में बाथा-झोड़ होयौ। दूजे दिन आगै पंडित तेजाराम अर लारै दुन्नीराम आपैरे दोनूं काकां रै घरां कानी जावतौ दीस्यौ।

⌘⌘

अबखा सबदां रा अरथ

कारुंदा=काम करण वाळा। अपूठौ=पाछौ। सदीव=हमेसा। चूंतरी=चौकी। मन माठौ करणौ=मन खराब करणौ। गुवाडी=मोटौ परिवार। आथण=सिंद्या। माणस=मिनख, आदमी। ताळ=बगत, टैम। संपत=भेळप। ओज्यूं=हाल ताईं। कोड=हरख, उमाव। भाख=भोर, दिनुगौ। सीरी=सैयोगी, साझेदार। मुसाण=समसाण। चख-चख=कळह, मुखजोरी। फूठरौं=सुंदर। साझौ=भेळप रौ, सिरोळौ। निपज=उपज, नेपा। मोकळी=घणी, ज्यादा।

सवाल

विकल्पाऊ पढूत्तर वाळा सवाल

1. चौधरी कनै कुल कित्ता बीघा जमीन ही ?

(अ) तीन सौ बीघा	(ब) दो सौ बीघा
(स) पांच सौ बीघा	(द) सौ बीघा

()

2. चौधरी रतनाराम टाळ उणरै कित्ता भाई हा ?

(अ) तीन	(ब) दो
(स) अेक	(द) चार

()

3. खेती रा सगळा काम ट्रैक्टर सूं होवता हा, पण चौधरी नैं पुराणी रीत सारू किणरै घणौ कोड हो ?

(अ) घोड़ी	(ब) बळद
(स) ऊंठ	(द) घोड़ौ

()

4. चौधरी री पोती रौ व्यांव हो, वा किणरी बेटी ही ?

(अ) रतनाराम री	(ब) साहब राम री
(स) हेतराम री	(द) दुन्नीराम री

()

साव छोटा पढूत्तर वाळा सवाल

1. चौधरी रौ किसौ भाई ज्यादा पळ्योड़ा हो, जिकौ राजनीति में ई रुचि लेवतौ हो ?
2. चौधरी नैं सवारी सारू किणरै कोड हो ?

3. कहाणी में लंबरदार किणनै कैयौं गयौं हैं ?
4. चौधरी रै मांचौ पकड़यां पछे घर अर बारै किणरी ज्यादा चालण लागगी ही ?

छोटा पडूतर वाळा सवाल

1. चौधरी आपरा दिन नैड़ा आवता देखनै सगळा जणां नैं भेवा करनै काँई हिदायत दीवी ही ?
2. “घण जाम्या ऊत जा कै घण बरस्यां।” इण कैवत रौ खुलासौ करता थकां समझावौ।
3. “जर्मी काँई बंटी, मन भी बंटग्या।” इणनैं समझायनै लिखौं।
4. तेजराम बामण रौ चरित्र-चित्रण करौ।
5. ‘बंटवारौ’ कहाणी काँई संदेस देवै।

लेखरूप पडूतर वाळा सवाल

1. “घर री गुवाड़ी रौ आप-आपरै स्वस्थ अर गांव री खुसहाली रौ राजनीति रा पड़पंच बंटवारौ कर दियौ।” कहाणी रै कथ्य री दोठ सूँ इण बात रौ खुलासौ करौ।
2. चौधरी रतनाराम रौ चरित्र-चित्रण करता थकां आ बात सुभव करौ कै कीकर वै गांव अर आपरी गुवाड़ी रौ भलौ सोचण वाळा मिनख हा।
3. कहाणी रै मूळ तत्त्वां रै आधार माथै ‘बंटवारौ’ कहाणी री समालोचना करौ।

नीचै दिरीज्या गद्यांसां री प्रसंगाऊ व्याख्या करौ।

1. चौधरी रै घरै दूध-छाछ री कमी नीं ही। तीन भैंस अर पांच-छह गायां नोहरै में हरदम बंधी रैवती। दिन ऊगणे सूँ पैली ई बिलोवणै री आवाज उगाड़ में दूर-दूर ताँई सुणीजती। भाख फाटां रै सागै गांव री लुगायां अर टाबर लोटा, हांडी अर जग लेयनै छाछ खातर चौधरी री ड्योढी माथै ऊभा होय जावता।
2. चौधरी री सीख घणा दिनां ताँई कोनी मानीजी। गढ जैड़ौ मकान तीन हिस्सा में बंटग्यौ। बाखल में दो भींतां खींचनै तीन हिस्सा कर दिया। खेत ई बंटग्या। जमीन बंटी जद घणी ले-दे, चख-चख होयी। रिस्तेदार भेला होया। आपस में खींचाताण होयी। जकौ घर सगळै इलाकै री पंचायती करूया करतौ, अबै दूजा लोग उण घर री पंचायती करण लागग्या।
3. तेजराम पडूतर देवतौ थकौ बोल्यौ, “थांरा सगळां रा ओळ-नावा जद अेक जग्यां गड्या है तौ मुसाण ई अेक जग्यां रैसी। थूँ बडै मिनख चौधरी रतनाराम रौ बेटौ कुहावै। टूटी जेवड़ी नैं फेरूं जोड़। बिना गांठ लगायां बट लगायनै पाढी जोड़। चंदा रौ ब्यांव है। परिवार बिना ब्यांव फूठरौ नीं लागै। चंदा, रतनाराम री पोती नीं है, हेतराम अर साहबराम री ई पोती है। थूँ म्हरै सागै चाल, म्हैं सारी बात कर लेस्यूं। ब्यांव पर भेवा करणा म्हरै जिम्मै। म्हैं तौ सगळां रौ ई साझौ बामण हूँ।”